

百司其何以整理庶務乎今以任呂之粗鄙光彥之躁妄三省之昏暗得居是職則是以一國之紀綱而付之匪人任其墜毀也豈不惜哉

夜流星出天中雲間入乾方天際狀如瓶尾長二三尺許色赤西方有聲如雷○平安道平壤地震

癸巳夜南方如火氣

甲午四方有濁氣夜流星出奎星下入天倉星上狀如拳色白飛星出內階星入紫微垣狀如拳尾長三四尺許色白

乙未以趙彥秀為資憲大夫漢城府判尹特命授李夢弼為戶曹

叅判宋麒壽為司憲府大司憲姜士尚為承政院左承旨李樛

為弘文館副提學命授是職樛中宮之舅也少無行淫穢鄙

褻或於祗席之際情慾之態極其醜惡聞者縮瑟及登第欲入

吏局人多薦之奉教金添慶以他辭拒之曰四館之坐一位嚴

於一位而樛已腰銀畧入侍則當坐奉教之右決不可為也由

是不得為翰林而為注書後終讀書堂之選金虬等駁而削之